



DS
796
Y3C55
1808
V.4



北湖小志卷五

江都焦循著

書人瑞第一

乾隆丙午夏六月有乘肩輿於市者一老人負囊從之囊中皆錢童子數十人繞其輿不能前輿中人怒責負囊老人老人唯唯已而入市肆飲盡肉半觔曰吾不耐輿矣步行去負囊老人隨之不及汗浹背輿中人姚姓仁和名是日值百歲誕日謁沿湖諸神廟肩之者其兩孫負囊老人其子也年八十矣仁和髮尚黑望之若六十許人精力健於子西山林樞言爲之治酒肉以待賓客有賦詩爲之壽者明年余省婦翁渡湖與仁和適同舟問其所嚮曰將入城策蹇乎曰步行觀其貌樸而厚類有道

者然而農也先是里人將舉於有司又嵯商某欲張其事仁和叩頭謝曰我農人生平未敢自放故活至今日一旦妄爲非農人所宜且促我歲用是未舉於有司或曰丙午仁和已百有一歲至此百有三歲矣仁和堰橋人

荒湖農人許子德見年九十歲生五子有祿有壽有茂有魁有福有祿見年六十七歲妻嚴氏生二子永林永發永林見年四十歲妻仇氏生二子聚山聚松聚山見年二十一歲妻李氏生子乳名穩子今四歲

書天時第二

中西之星名各有異蓋星本無定名隨所見之象以立名而記其度次耳湖間星名又名有異以參中三星橫斜若犁名曰犁

星諺云犁星落地水成冰謂十二月夜半參宿西流也以昴七星相簇曰七撮星正月七日八日觀其在月之上下在上角豐在下角歉以尾上二星爲水車星平則晴倚則雨軫爲拙婆登帳星合心房鉤鍵東咸及下天輔從官等星爲老兒星畢爲父星貫索爲荷包星天市垣之吳越齊中山九河趙魏等星爲船星北斗爲旗星以心宿爲挑燈草星荷鼓爲挑石頭星栽種收歛以諸星之伏見爲候

正月十三日於社廟前立一長竿絡以竹片懸燈百餘箇視其色以驗年之豐歉至十九日乃已十五日懸大秤人就而衡之以驗骨之輕重增損婦女擇有松柏之地環繞而行謂之鑽松三月三日簪薺菜花以祓目疾四月一日插阜茨樹枝立夏日

食豌豆芒種節爲交梅有草結小實似楊梅狀青色大如豆謂之渴睡果是日佩之立秋日食瓜八月十五日以麥作餅供月十月朔日食慈巴煮糯米和豆屑爲之十二月二十四日送竈以破瓦載飯焚於門外焚枯草作燄圍不生蟲且以占年也除夕貯水於甌稱其輕重記之明年每月初一日十一日二十一日復等其輕重輕則雨少重則雨多

嘉慶甲子四月朔天氣嚴寒草葉戴霜甚濃黑色著白衣上如染緇惟黃珏橋數里有之

黃珏橋東南里許舊時有蔣姓立貞節石坊立之夕雷起震坊粉碎遂莫敢復立此乾隆初年事嘉慶七年七月有男女十數人於管家尖刈稻適陰雲四起黑不見人田畔有廬衆以將雨

也其趨入少頃雷起廬中擊殺一家夫婦幼子三人其婦脅下一孔貫顫幼子方食乳其男子死又一處中有人間之有前夫子爲雷掣入水田中不死雷起時不甚震旣霽衆散方見屍橫於地也

書物異第三

廟頭鎮四面皆水有大竹墩又溪水環之舟而後達康熙二十二年有虎蹲竹中人繞溪外觀之莫知所從來也居一日而不見亦莫知其所從去也

乾隆乙未四月飛蝗如雪竹林木葉皆盡甚至損人衣褻傷人肌膚相負渡水穹然若梁有老婦持刀詈之竟爲嚙死蝗之盛莫過此矣然是時小麥已熟皆齧落其穗狼戾滿田而不食於

是里中貧人攜筐擔籠拾而貯之日可得穗一石鰥寡孤獨廢疾者有養焉田主無租而窮民得食有祝蝗爲仁而拜之者亦一奇也

乾隆甲午秋有臭蟲自南來形如小鼈累千萬盈几席牀帳間穢氣可厭春秋所謂蜚也不傷稻而去

乾隆甲寅三月至五月不雨六月六日大雨農喜若狂伏日無盛暑酷熱市井無裸露者七月苗秀長七八寸豐年可卜矣八月之初穗頻稿折及其時一望如雪自節以下青且澤節之旁有小穴黑藩外浸折之有蟲黔首皓軀古書所云食節者蟹也災過於水旱不能與水旱同其災蝗害可捕而此蟲隱於節間不可捕書之以待格物者思所以治之也十數年前有黃蜻蛉

數萬飛繞田間遺溺苗葉則頭結而萎衆以爲社神馬嘉慶丁卯七月雨後生蟋蟀晝伏夜出食蕎麥麻豆至於再三二者亦莫知所以治之

嘉慶甲子四月湖隈生蝗農甚恐已而化爲蚊大如秋蠅齧人痛入肌膚而二麥竟免

乾隆乙巳大旱湖水涸竭民饑無食乃掘豬荸薺作屑賴以不死豬荸薺者三稜根也生湖灘圩田中高郵賈良璧有三稜賦其序云三稜者農夫所謂撒浪者也田中見之則五穀不生已未之秋郵氏大饑有闔戶自經者忽老嫗令食此物遂家傳戶曉賴以全活者數萬乃記其事而爲之賦以告後人之饑饉而無從得食者然則乙巳之食此固有所授矣

湖中三稜有兩種其一爲豬薺薺其一爲草子所謂廣陵草葛者草子所織也有家野二種家者莖高五六尺枝葉皆以三爲率湖農三月種之旣長掘起頓於一處而後分栽於畝秋刈而束之以灰漚坑中漚熟以刀刮去穢又刮之其表爲草皮用之繫物絞索其內暴乾析之成絲謂之草紗四五月紡績成布謂之草布硫黃熏之作白色以製夏衣勝於麻葛惟洗久則黑或經濕則易朽耳野者徧生湖澳間僅可絞繩不中績布

嘉慶丙寅六月水退其車田稻苗潰敗者生稻孫竟秀而實其下者種晚稻多變爲稗每石相半農家分別之晚稻石得米三斗稗亦然以稗米作粥民一冬頗賴以飽書之以見蕘稗不可棄

丁卯湖水涸湖隈生龍古高七八尺民刈之頗獲利龍古盡掘土中茆根以爲食沿湖日數千人偃僂如蟻余令童子掘之其狀長二三寸有毛去其浮皮白嫩甘香可烹食是物惟白茆湖有之此湖之所由名耶詩云言采其茆或卽此乎又有剛耳薺叢生如盤貧民亦采食

丁卯九月二十一日鴛鴦塘陳士連家牝彘產一象半日而殪陳氏子持入市衆簇視之有三牙鼻長四五寸隨手伸縮謝姓者以三百錢買之保甲孫彭是日親見來語余

廟頭瞿姓者患病不能爲生理忽有大蜂帥萬餘小蜂飛繞梁間約半月成一塔高三尺徑六七寸爲七級每級有牕櫺可啟閉遠近往觀者人投一錢日醵錢數百一日蜂去瞿隨死所得

錢足供棺斂此乾隆壬子事

章雞至春變爲格敦劉淵林注吳都賦云鷓鴣似鴨而雞足郭璞云一名章渠顏師古云今之水雞也然則章雞卽鷓鴣與格敦或卽鷓鴣之轉聲禮記作盍旦

哭黎大如鶴頸有肉囊可盛數斗口張則囊見漁人得之賣於市每日須飼魚數觔按此卽鵠也哭黎正鵠之緩聲

宋家橋出瓜大者如碗小者如杯皮倭而瓢紅味甘而醇近年少遜其人力之不齊與

書金石第四

桑營之農濬塘得一頭骨大如斗有二石農得其一而以頭骨爲燈檠余族人訓蒙其地者偶見之令埋其骨索石歸余以

二金買之置半九書塾中其文多殘缺首云十二年歲次乙亥
閏二月壬辰五日其下缺次行云馬軍都指揮使金紫光祿大
檢校其下缺三行云孟璠誌銘並序則撰文之人也考自漢文
帝十四年乙亥至明崇禎八年乙亥凡次乙亥者三十一惟宋
文帝元嘉十二年乙亥以此文考之非也朱梁末帝貞明元年
淮南楊渥尙稱天祐十二年是年乙亥有閏二月天祐十二年
即吳越之天
寶八年十國春秋是年閏
二月己亥王至自衣錦軍是石十二年三字上尙存祐字之大
半族人云初出土有大唐二字爲鋤鍤所毀遂不可識容齋三
筆記鄂州興隆寺鐘題誌云大唐天祐二年三月十五日新鑄
金紫光祿大檢校尙書左僕射兼御史大陳知新銀青光祿大
檢校尙書右僕射兼御史大楊琦大字下皆當有夫字劉原道

十國紀年楊行密之父名怵與夫同音故將佐爲諱之以此相較其例正同則爲淮南楊氏之臣信矣乃其銘云墮雁烏號斬蛟龍鏐一帶山河盡曾開拓定難金批擒兇鐵馬孝敬奉上恩威臨下又云君旣傷儀臣惟洒血淮北江南流傳英烈則是淮南開國勲臣死君之難者方張顥徐溫之殺渥也其有義形於色寧以身殉如孔父仇牧其人者乎溫旣殺顥以大逆歸之因獎從難之人而以禮葬之耶石文殘缺莫考其人書此以俟知者

誦芬庄掘溝得一古磚上有朱書字置水中隱約可見竹廬都尉曾以示余上有將軍云云時酒酣目眊不能細核明早都尉北行及其歸問之已爲佃客作磨刀用字皆磨去矣余族父九

和言此磚上有檀道濟三字都尉言無之惜未嘗細核也

仙竹顥孚佑菴一小銅鐘明洪武甲戌鑄無鑄者姓名

北方寺鐵鐘永樂十五年四月鑄鑄者姓名有李胄韓緣陳福黃福永卜善富饒善靜張福圓閔福元口元福僧興吉

誦芬庄觀音寺鐘成化十九年鑄鑄者姓名有馬成焦原韓亮魏誠魏福鮑宗秦福葛林陳能張龍陳四榮鮑寬陳裕陳成陳龍王宏信李智交口春張甫段成孫富吉寬二十二人冠以信官又吳太口間孟成王福蔣英聞忠李口鄧浩何海王貴賀春王玘周貴李貴口口張剛張山趙名李海趙全劉能高明張林徵正二十四人冠以信士主持北正圓口圓清募緣僧人圓勝又信士馬仁同男馬口口主造匠石忠胡義後又鑄通州張家

灣大口關信士張福劉氏杭宗倪氏倪興仇璫彭宗施興蕭貴
倪口子能鄭能吳口口旺夏旺周廣呂慶顧謹口同許俊榮宣
口鼎口口任華莫英董成郭通康福徐政莫文樊廣王亮陳正
吳氏莊貴王氏謝敬單敬單能曹璫曹信李寅陳俊孟亮張名
黃景文宋玘李名隔十數行又有信士盛昭王氏口口許忠邵
能王名許鎮呂斌劉剛劉信許誠許能許潤向韋梅問呂真卜
友劉通徐俊曹全楊福張原韋金衛俊劉福陳大名李泉薛仁
梁智宋名樊貴

戒壇寺鐘正德八年鑄

廟頭司徒廟有成化時鐘見范荃詩今不存

治平寺鐵鐘一口嘉靖二十九年十一月鑄鐫姓氏江鑰鑰妻

□氏桂鎰妻吳氏

桂字疑亦江字

江洪洪弟江清江漢王希介曹鉞

鉞男曹芸曹芳孫珩孫琪孫必捷孫必成梁萬王昇金鎮袁瓚

梁鏜毆和□□馬氏楊盛張氏吳氏寺僧明□又有石蓮花座
萬厯三十四年八月二十四日孫有威梁之升造

大帝寺鐵鑪一座萬厯二十八年十月鑄鐫字云揚州府江都
縣豐樂鄉永豐鎮各庄人氏梁承仁陳科梁孟春金賢梁承義
姜桂程有富孫敏梁承榮盧正梁□□于富梁承智劉勝梁堯
日程科梁承基聶學汪有能聶龍梁季春曾彩劉應賢聶□梁
可聘徐科梁可讓梁錦梁進科程杲周遇春孫正梁仲祿劉好
梁仲鶴曾和梁子遜梁春王宣劉科王天祿金立曹義張元劉
有禮彭文梁喜保周能張應奎大帝寺久圯鑪在治平寺中其

地爲永豐鎮及孫梁諸姓尙可賴以考見

乾隆乙巳湖水涸漁人於黃子湖得一金碗醫士秦宏一以千錢買之識者以爲金甌盞也後被訟於縣爲縣隸取去今不知所在

書詩話第五

許師六太史獵微閣集有題樓碧山堂詩云樓碧山堂數酒尊爲尋舊跡洗苔痕半橋遠望諸村見三載題詩片石存直引水光搖篋笥誰從花徑老兒孫何時高臥湖邊宅夜夜濤聲入夢魂年年車控遠鄉塵老眼時逢赤岸春愁向天公占甲子喜看人事勝庚申吹簫橋畔多遊冶賽鼓村家說鬼神獨惜故交中壘後一椽茅屋臥湖濱

謂故人劉書秀

又有凌青閣及池塘生半陰處

兩詩又湖中詩云湖邊蓊鬱甚髣髴足幽棲四牖橫高樹千村
獲短隄斷橋來客少斜日落潮低最喜田家叟驚心是馬蹄四
望少烽烟湖村慣隱眠柳青纔到地水碧欲連天花鳥三春夢
樵蘇萬古緣不須餐玉法象外說神仙赤岸松風好尋芳坐草
堂細烟開窄徑老樹架危梁燕雀閒相狎山川不盡藏何堪勞
智慧窮老理縑緇小閣池邊立欽崎石亂投雙眸橫水面一角
露牆頭草木幽人意漁樵隱者儔纖纖風月好無事夢揚州棲
碧山堂爲許氏別業在公道橋今祠堂尙存市中祠堂祀鄉賢
許仲容及念修力臣仲容名明賢念修名承宗力臣名承宜康
熙丙辰進士官至工科給事中師六名承家康熙乙丑進士官
編修承宗承宜承家皆明賢子相傳許氏明季避地北湖故湖

中有其別業及祠墓然縣志載其避地金陵則未必居湖矣今
第據師六詩記其別業於此不復爲諸許立傳別業所在不能
詳故亦不專記如誦芬庄例也師六子昌齡亦有棲碧山堂詩
見碧摩亭集

費滋衡姊嫁黃珏橋王敏士余見滋衡手書拜姊墓詩淒楚動
人今錄之驅驢古北門道途多恍惚淒風刺人眼舊事驚慘戚
雖同處鄉縣忽忽十載隔那無親弗思水陸異周折念昨壬戌
年呵姊甫出室弟來視阿姊冒雨行空寂夜半至湖村漁泥雙
脚赤吾姊隔屏呼驚喜見顏色人事不可量修短命所厄兩氏
骨肉親展轉各棄擲今來問故道但信僕夫述其日風捲塵僵
僵日色白舉策驅我驢驢瘦苦無力昔修新橋梁缺落幾甌

有柳七株齊心記且不識十里淮子橋衢路渺難覓回塘一曲
逕細尋亦不得道旁多穀樹秋深都結實纍若珍珠貫圓若珊
瑚赤其他雜林藪一一莽蕭瑟人心懷慘怛樹木皆鬱悵半途
賈家墳結轡暫憩息逢僧問去路前林指昏黑晚至黃垆橋舍
驢步阡陌時恐改故蹊而又開新術遙望是君家門閭今轉仄
門前開方塘仍其舊垣壁忽逢一老嫗見面若仿佛開口及姓
氏擬度果不失卒道十年事迸淚沾胸臆瑣屑話生平語不厭
倉卒嗟此隣家婦猶思阿姊德前行入其門呼應主人出上堂
拜親母次第及他室王郎新娶婦兒女已歷歷見甥復呼姊歡
與悲交集譬如接枝花同根却異質婉轉留一宿中夜自悽惻
幽咽牀下蟲涼月照白壁夢覺平生事芒刺在背脊人生天地

間聚散總何益明且上姊墓逕荒迷不卽逡巡隨人行一里至
墳域野草何蕭蕭傍添新葬骨十載無封樹那求碑碣石亂草
牛觸開古竇蛇穿入招呼守墳老移時至墓側斬藤乃下拜焚
楮烟旋息平生最好勝一旦裹荆棘傷哉泉下人知今是何夕
念此驚我魂嘔逆心不懌從此別爾去再來定何日范荃清明
坐王敏士齋次作桃源憶故人詞云花光草色還如舊正是清
明時候雨過苔痕鋪繡屐齒侵香甃爲言上巳今朝又修竹茂
林前後逸少風流俊秀袂襖能從否觀此敏士亦佳士也

江閩字辰六吳湖州壻也有至黃子湖訪外舅詩云扁舟四望
水漫漫天地偏從曠野寬雉兔隨時供射獵魚蝦鎮歲足盤餐
遠連暮靄村烟碧近接秋原木葉丹一事略爲筋力累風煎月

下愛投竿又題外舅快堂詩云誰謂草堂隘悠然別一天小橋
斜避樹清沼暗通泉野寺荒雲外漁舟夕照邊主人幽興熟刪
訂與微權

吳璉字馨聞號侶菴其先山西襄陵人康熙甲寅乙卯間居湖
大會賓客其柬客詩有不用鳴鑼集之句用東坡湖上宴客事
也是年東軒落成范荃題以詩云依舊平湖十里烟憑君收拾
到堂前啣杯直吸波心月倚棹空摩鏡裡天鷗鷺別尋方外侶
琴書賸結野人緣閒來一覺朝曦滿不管花堦過八磚後侶菴
城居湖上別業屋宇垣牆多爲風雨所壞侶菴偶一至湖荃復
以詩寄慨云別後愁無極空懷天地寬故人猶縶縈衰柳自闌
珊蓬鬢秋風老絺衣夜月寒東來瞻馬首長憶路漫漫侶菴以

貢生考授鹽運使運判其本末不可詳別業亦莫知其處也

康熙間湖中文酒之集最盛如孫滋九之柳庭徐又陵之坦菴
文命時之深柳堂高蒼巖之湖西別業皆饒水竹之趣高氏尤
稱清遠范荃題湖西別業詩云湖西別業高君宅十載傳經坐
此中滿沼荷香消夏日一簾柳絮撲春風人同咸籍饒真趣客
盡鄒枚有素衷最愛東軒憑眺好水雲浩蕩帶飛鴻

郭士璟廣陵舊蹟詩詠六湖云六湖舊是桃源地問著關心總
不知一自浪驚高堰後誰看雞犬入茅籬

余有寫本漪菴詩一卷得自姑夫范珉仲家卷中有隱居湖上
答友人一首云偶爲逃囂隱一邱長卿老矣曠交遊愛陰每植
隄邊柳寄樂時投水上鉤荒館圖書聊破寂閒門衣帶嬾爲修

不堪又與風塵近慚愧違時到白頭詩有懷葉博之作又有弔
梁飲光死節詩有文壇麗澤之語則生於明季矣惜名氏不傳
僅此詩集且屬蟲殘鼠嚙之餘幾不可讀錄數首于左以見其
概立秋云昨夜梧桐葉墜柯商聲颯颯枕邊過蛩號細草增詩
料露冷牀羅偏睡魔節候已經隨髮改離騷每覺到秋多火流
瞬息衣將授太息炎涼奈若何雪牕雜詠云楊柳知春色半含
霏微雨雪暗烟嵐村茅隱樹堪充畫萍葉隨流且結菴地上野
蔬清餉足杯中濁酒夢魂酣貧家瑣事皆詩意杖夜疎傭我不
堪晚霽湖干夕照明雪銷牆角尚留清柳因久潤搖新綠鳥快
初晴弄巧聲樂事可攜琴作友愁城能破酒爲兵年來白放三
春去皓首風流努力爭涼秋云涼秋寂寞蒼荒樓市遠塵囂隔

水西兩影雪霜成老叟一牀風雨共荆妻澆愁囊涸唯謀寢得
句思繇嬾覓題菊瘦無言陶令嘆紙窗淅淅助人淒五言云護
菊閒驅虎敲鉤學釣魚樹多驚易暮亭敞覺先涼溪雲舒卷靜
野榮短長肥壁富詩成市松枯貌近禪柳浪吹帆軟谿光浸月
斜落紅憐砌冷搖綠贈窗清殘荷風欲響流水月難圓

姜雪蒼爲僧有祝髮詩今不傳錢塘潘雪帆問奇有題雪蒼祝
髮詩刻拜鵬集中云三生石上厭華簪火宅蓮花尚可尋天下
有絲都繡佛眼中何事不灰心酒旗歌扇人猶在箬笠櫻鞵路
已深禪院倘能攜我去一龜動禮象王金

雪蒼有旣上人詩一卷范荃謂其詩才清越筆致隱秀如舟入
漳江出入石罅清瑩如鑑細草小石歷歷可指兩岸壁立萬仞

如削蒼翠欲滴其篙師舵工非長年三老則觸石立碎以故舟
中之人俯仰瞻盼應接不暇今錄數首於左歸湖云市喧難久
住旦夕思湖陰布衲出城遠春光入我深風含慈母意草挾少
年心自覺歸途直徐徐聽暖禽過范石城齋留壁云如此開軒
坐東風意若何自然來樹色忽復有禽歌天地故人少草茅元
氣多前溪將結夏莫更懶相過獨眺寄月樵云君應開戶立漠
漠野田空我亦橫襟坐茫茫水國東斜風雙鳥白細雨一花紅
咫尺春無限幽思何路通清明節云只此一枝柳年年折若何
冷祠田父酒荒塚牧兒歌白髮老仍出青雲變已多且拈花作
供空色兩隨他林間候鶯語云黃鳥來何暮青春去已賒能無
思故柳亦恐見殘花嘖嘖燕多喜紛紛蜂自譁好音終不遠芳

樹滿天涯沙香洲茅舍落成喜修慧師遠至云數椽今始就竹
樹繞溪回我但隨緣住君能爲法來板橋支臥柳水鳥近香臺
十八賢如會白花應再開院中蝶云低昂惟有影來去各無言
不入羣蜂伍知爲異草魂風冬家未定雨暗夢何存若是繞花
思安能戀水園歲暮七律云刺面風沙斷旅魂浮生只覺寡營
尊樵枝爛足三冬火野雪深封十日門有客贈梅先索偈與禽
分粒各無言何須楫楫攢頑石朝夕鐘聲到四村雪中云板橋
無蹟過荒汀玉樹橫溪倒影停縮項水禽方咄咄秃唇蔬甲漫
惺惺龜留火緒生晨爨竹作冰聲入夜聽欲乞寒花供大士北
山人去掩空庭月下與慧修山雨二師納涼云竹樹玲瓏月幾
層娟娟螢火挂疎藤三分夜氣初降暑一片秋心已化冰風便

乍聞荒寺鼓溪回斜見遠村燈坐深若問無生事今日茶香且
未能試燈夕坐如是菴感舊云殘雪千門晚乍晴居然簫鼓亂
春聲莫教商女歌瓊樹忍聽何戡唱渭城烟市夜闌燈易散竹
堦人靜月孤明開窗又是三年矣幾點寒花太瘦生答夏次功
云俯仰無聊愧衲衣敢將饑渴附歌薇風吹鳴鳥春何遠月落
空梁夢已非天下士如君尚隱山中雲笑我遲歸肯來湖曲尋
蓮社人在瀟瀟水竹圍張赤城瑤房伯仲移居橋墅云我欲成
茅君復移圖書雞犬一舟持何人於世得無累此日不貧翻可
疑講席尊嚴無道在山田磽瘠有秋遲獨憐煮水澄湖畔少却
二難來誦詩又張無違移居五言二首云不肯憐華綺翩然來
卜居聲光生畎畝風味見詩書種秫將爲酒垂綸豈在魚樵青

北湖小志 卷五
家自有寵錫更何如長統能全志田園可樂賓德公知遜跡妻
子亦超塵何事宜今日如君類古人南溪有鐘磬且夕引爲鄰
無違亦當時高士湖中人絕無知者賴此以見

梅衛瞻琇江都詩人也嘗往來湖中與陳浩海陸价人范石湖
呂尊舟訂詩酒之社有寄陸价人詩云故人新歲見一倍語寒
溫霜雪存肝膽江湖越夢魂承歡聊菽水養拙且柴門梅柳沙
村路春風約酒尊刻其鴻堂詩稿中又有常兆熊招集詩云會
著衝泥屐來尋大隱居柴門殘雪後蘭徑蕙風初紅縷吳江鱸
青絲楚岸蔬邀懽兼悵別把酒意躊躇

徐坦菴范石湖羅然倩爲北湖三詞家坦菴詞集久行於世石
湖嘗與徐松岑合刻諧聲集今不傳然余有其詞百餘首擬與

坦菴詞合刻別行唯然倩所著霞汀詩餘零落不多見僅得九
首備錄之以存其梗概晚坐浣溪沙云斷岸頽橋瀉水痕淡烟
濃樹倚孤村不須高手仿雲林幾點疎星行客夢一灣新月女
兒心誰家搔首怨黃昏春閨卜筭子云日午怕梳頭不擬妝成
豔才把青銅還又拋羞與儂相見強欲理瑤編著指心先倦小
語喃喃會罵人輸與梁間燕漁父畫堂春云波光遠映蔚藍天
朝來賣有魚錢瓦盆擎處荻花偏醉了重眠不管秋風叢桂寧
知春夜啼鵲妻兒團坐席帆前閒看雙鴛美人南柯子云瘦約
裙拖翠障羞扇影蕉妝成好處轉無聊手把一編深坐背花瞧
無語情偏篤含嚙臉更嬌新詩幾字抵投桃試問三生石上怎
生消臨江仙云昨夜海棠開徧矣朝來幾片飛英推窗聞喚乳

鶯聲沈吟如有句殘夢未分明記得當年隄畔見流光屈指堪
驚無端暮雨與朝晴檻花迎淚眼山鳥伴愁更鷓鴣天云破壁
何堪風雨侵又兼門外水痕深持竿展畫開昏眼拾火烹茶候
嫩音敲幾字敗雲林松風熟後坐簷陰酒家未解耽清玩不質
螭頭水玉簪南鄉子云疎雨濕檐廊一片虛明在小牕睡起脩
然無箇事蒼涼幾點殘紅落硯旁何事恨偏長欲寫新詩怕愴
傷一自玉人歸去也他鄉臨水登山總斷腸蝶戀花云漏無聲
人語悄洗却胭脂一點唇兒小繡被春深寒尙峭情多只恨宵
陰少百舌頻催曉易曉握手匆匆秣馬鳴芳草幾寸衣裳寬褪
了憑誰寫去相思稿玉樓春云爲誰消瘦悲紈扇旅夢天涯尋
欲遍遠書細寫紙條兒央及梁間飛乳燕支離不穩青絲簾才

剔銀燈心已倦誰家乘夜搗秋砧又送新愁來小院

羅然倩詩集不可得有句云竹間偶坐尋苔跡花外閒行待酒人其高致可見

葉敬白華堂詩有龐大繩直從黃子湖寄書附示近詩兼惠佳味賦謝七律一首云吾愛風流龐士元湖光千疊到柴門緘題碧簡驚晨夢潑刺銀鱗佐晚飧半尺烏絲分異錦十年青髯隔金尊何當閒夜聯吟去捕蟹篝燈入水村

范荃哭黃澹園詩云衰病催君未老年多時余已重潛然看花忽敗前春興畏藥惟宜白晝眠橋市每聞傷躑躅城闔猶憶共流連可憐竟逐東風化聊贈泉臺買醉錢君去泉臺最可傷故人星散恨茫茫閒齋不復爲懸榻野肆何堪更舉觴地下有緣

尋勝侶天涯無路問家鄉遺孤未識憑誰托辜負青氈一脉香
弔呂尊舟云三徑曾邀二仲遊霜庭剛報木瓜收吟酣絳蠟揮
紈扇談濕青衫顧蒯緱俠氣尙留眉宇在禪心已共水雲浮故
人未及生芻莫丹旆能爲范式留哭羅然倩云極目秋江泣斷
雲蒼天何意喪斯文一春梅放傷朝雨五月榴開醉夕曛敝帙
尙留新改字荒山空見未成墳從今得句憑誰正破硯殘書擬
盡焚江雲秋水慘鱗鱗結得霞汀去後身草色一庭留別恨蘋
烟兩岸伴孤鄰月沈山曲添新冢風滿湖頭哭故人我欲招魂
君至否水邊花裏薦清醇訪文秋翎五律云獨步秋郊晚行行
入雁羣稻香留滯穗人影逐斜曛倚樹看紅葉臨流弄白雲醉
容真可掬強半爲愁分借郝騏生暨仲子雯生歸湖云與君攜

君子云范氏饒於財明季屢被盜一日寇至家人皆避去一童被執盜拷積蓄所在童不言剖其腹血上噴壁間百餘年來其跡不滅又一日寇至家人皆避去令十數佃客守家盜明火利刃勢極凶熾一佃客云與閉門拒之不若開門禦之鼓勇率衆力鬪氣百倍盜潰棄械而遁明日視之其矛皆以枯魚縛竿首黑夜視之如刃然若童與佃客可謂能忠其主矣惜未問得姓名不克爲之立傳也康熙時有名士佳者居之士佳仕爲涼州府同知罷官後樓歸其族人德言德言於樓側種萱一畝築亭臨之花時鼓琴其中以娛樂其母旣而爲沈氏倉嘉慶甲子始拆毀今無其跡

張志雲字際五號慕槐其先鄞人也父以材武得官防禦多善

績獲罪免官來居黃珏橋市而浮海賈貨以舟溺蕭然無一物
存耻見妻子不肯歸志雲少長旣締昏郭氏市歲毅然棄家出
尋父幼稚不慣行路又行李困敝更閱歲欣然奉其父歸問其
狀始出茫然直渡錢塘歷天台雁蕩間所攜止筆墨素紙到處
見山水花樹鳥獸皆握筆摹其似漸卽所見人貌之稍異者畢
收之紙上自覺此技可通於神旣得父所父曰吾老矣歸何以
食志雲曰兒筆可代耕也父疑之徧訪吳越間老畫師示以所
作畫幅輒太息曰此天授非人力也志雲遂以畫名亦能詩與
郡中諸名士月一會爭雄長焉

裔之爲氏惟湖中有之余聞諸先君子云明功臣徐馬兒之後
也馬兒坐藍黨其子孫改易姓名逃匿湖中於今蓋五百年其

先世神主內仍書徐某凡祭祀告神之文亦書徐湖中有裔家集裔家莊族甚蕃衍世以耕讀爲業今亦散處四方

湖中常氏相傳爲明開平王後在明季姓胡雍正間始復姓常改姓之由不可知也常之先賣藥於市其肆尙稱胡家藥店

元末經張士誠之亂洪武定戶江都止存十八家其最著者有火郝二姓湖中火家洪郝家樓其聚族處也今二姓他徙無一存者尙稱其地爲火郝鄉相傳黃珏橋隄未築之先自陸家嘴設渡達劉家嘴名三陳家渡今稱渡船港者卽其處也渡南陳姓最富有園亭樓榭名陳家樓渡北則火郝爲巨族自渡口而東有街市人烟輳集商旅往來河淮旣合滙爲六湖市移而西是渡乃廢

前明孫梁二姓爲湖中望族有孫某與梁飲光同時爲縣令梁死難孫迎降迄今里中人有梁忠孫不忠之謠

裔翁富於財當明季河伯爲災上下河艱於疏理翁親赴邑中願輸家財以通水利於邵伯鎮北造閘一座隄之北水自上流而下隄之左右百里居民實利賴之因名裔家閘今改爲嵇家閘翁之元孫德林字子懋事見謝九成祭子懋文惜翁名字不可得

陳敬菴幼失父母事王父母以孝稱王父疾篤刲左臂肉和藥以進事見常鴻儀祭敬菴文惜本末不詳又陳儼祭范翁文言其生八歲而孤事母以孝母有疾稽顙北辰求以身代割股肉和湯藥以進母沒哀毀踰禮又言生平言笑不苟遇人無貴賤

大小一待以誠實不欺敬惜字紙合藥濟人買禽魚放生種種善行不可枚舉篤學至老不倦經史子集外佛書醫卜之類靡不究心尤長于詩詞康熙癸未秋夢異僧來迎辛丑二月初七日易簣時亦稱有佛在座歿之日里人士無不墮淚草稿中不填寫名字遂莫究何人也錄於軼聞以俟知者

湖中文學舊推鷺鷥溝張氏一門張濩字二我康熙辛酉舉人子思武字韶聞雍正丙午舉人生三子長重基字學田縣學生仲重淑字儀一乾隆丙辰舉人季重培字白申雍正己酉舉人韶聞精青烏家言嘗擇地葬其先以爲必連得科第是科已中式發榜時以對策引佛經語被黜相墓再三日誤矣亟改向果五年而得三孝廉

北海志 卷五
滿省字青扶廟頭人少聰雋有儀容陳公宏謀守郡時極愛之
曰揚州之上吾得滿謝兩生然滿以文勝不如謝以福勝謝謂
少司寇浴生也滿意以諸生終

謝余詮題裔虔翁室扁云歲丁卯其先大人寢疾虔翁徧訪醫
藥繼則刲股肉以進迨戊戌季夏虔翁病令女少君亦剝股肉
以進其爲父子足法矣閨門之間漸而鄉國風俗所由隆也虔
翁名不詳

乾隆辛巳大水農人陳在甫乘舟於怒濤中鉤取器物遇其戚
負一兒於背抱棟漂水中呼救陳懷其木而推戚於水所負兒
遂死戚漂至金灣遇拯得活明日趨至陳家面唾而責之陳遂
不齒於人陳死久矣家貲蕩盡其子爲竊賊咸以爲其父之報

也書此爲鄉人戒

鄉里有醵錢搖勝會者獲之常敘五父常翁以敘五省試無資
斧言於同會友請讓借適前搖者已有三十三點拒不肯矜甚
翁持孟仰天呼曰兒若得鄉薦將軍佩印來搖之得點三十四
凡五枚得六一枚得四俗謂之將軍印是科敘五登賢書阮丈
達陽說

余里中常翁名森南富於財如廁一白鏹在地俗以金銀之俶
露者爲不吉森南唾之曰爾無禮乃不衣冠見我耶不顧而去
已而悔之曰奈何不取然見之良久廁上不一人將他人有矣
復往視之白鏹故在已風吹一紙覆之不更俶露仍拾歸他人
竟未見信乎得失之有數一鏹且然況大於此乎

黃袞公道橋人草書入懷素之室每大書鵝字得者珍藏之
聖祖南巡袞年九十迎

鑒獻字賞大緞二疋

書賈夏老者浙江龍游人與湖上諸文人遊順治初遂居湖性
戇直不好諛佞見不平輒攘臂爭是非動引古聖賢面折之晚
年喜星家言爲人推衍星命必引福善禍淫之理委曲開喻贈
貽不計多寡貧乏者不惟不取且隨力資給之旣老而貧麥飯
豆粥日得再食便忻然自得非其道豪髮不肯妄干徐坦菴逝
奔赴啼哭如嬰兒范荃撰夏老傳以弔之

歐陽復旦字爽谷號晴峯公道橋人善畫妙語言嘗遊城南秋
雨菴菴僧竹溪以水請盥作禪語曰居士六根清淨請洗沐爽

谷潑其水答曰六根既淨又焉用洗又嘗過山東青駝寺寺僧
托病不起爽谷故知醫強爲之診曰此證虛須人參吾行篋中
有此當持贈僧頓立起情色極恭爽谷凝視良久謂僧曰才細
察爾面色非真虛參可不用矣題一詩於壁而去

書鬼神第七

族人焦建維居公道橋娶一營卒婦婦攜其前夫女來同居年
十八矣嘉慶十二年女忽目直視僵臥氣絕但身溫軟不卽殮
良久甦曰適對簿來前生爲王林妻林業銀匠有幕客石先生
者以金五十兩銀百兩令鎔作器林利之始令妻餌以色妻不
肯復與妻謀殺之妻又不肯旣而殺於某橋下埋其屍人無知
者今石先生控於帝矣言已又僵而又甦如是者五日案已結

王林生六合縣富戶逮至年十五六面白如粉衣飾鮮美項下有金鎖圈一訊而服以妻不同謀釋回而林已下春磨獄始訊者有大老爺三老爺大老爺面東坐三老爺面南坐獄既定俟五老爺成之其始過一橋危不敢獨行有一人以手援之女怒斥曰吾女子豈可受爾援其人乃接以馬策曰我爾生父陳文節也無畏當護爾於是五次皆過橋皆以策援道渴甚見甌水欲飲之陳以策擊甌碎訊時梏兩手痛甚視兩手指果青腫其大老爺與一丸藥令吞甦時尚在喉若沙石飲以湯乃下嗚呼余觀搜神還冤等記以爲儒者之寓言然狐笑之御申生灌夫之守田蚡彰彰於經史者詎皆虛論耶神道設教聖人誠有以通乎幽明之故其跡似怪其理實庸建維不諱其事而鄰里鄉

黨罔不目覩而親見之特書於此以爲後人勸閱者勿以爲荒誕而忽之也

梁姓者東庄嘴人偶腹脹以刀割之腸出又自宮呼郭姓者視之言餓郭飲以粥已而稱心若絞宛轉以死或曰梁嘗盜神像肚中物故有此報或曰有淫惡戊辰春正月事裔德宏說

黃珏橋東嶽廟余旣記其靈異於卷二而神之昭著非一事也廟本高氏建造高之裔有爲僧者住廟中不守戒律跡殊穢褻一日登案上爲神易衣神掌忽起擊其頰踏於地高懼甚徙他處

水災之後湖中人鬼相雜有宰姓婦居赤岸湖素愿弱且懷娠將免矣有神附之男子前導亦作神語導者躍宰婦緩步張拱

翼如每至人家宅中南面立索焚紙錠或許以血食乃去然見土神祠則拜嘗至吾友王景升家其導者望門而唾曰好大火氣少時宰婦來景升稍稍折之亦自歛退余憶一說部書中記有嶽神憑婦人者或詰之曰神正直何爲依婦人神語塞乃自白其爲鬼非真嶽神也宰婦亦其類耳又有憑以至木工家者木工持斧大呼曰不退將斫爾其人竟去

書疑義第八

劉一清祈請使行程記云德祐丙子三月初三日宿灣頭初四日過邵伯鎮徑行一堡子濶六十里北軍屯戍又有水寨屯軍甚多內有小堡子六十餘所波羅相公阿里右丞在內初五日過天長縣初六日渡天長河初七日過寶應軍按元史元兵屯

新城此言濶六十里則凡今北湖之地皆其屯所天長河蓋卽
今秦蘭河是時高郵以東尙爲宋有故自邵伯鎮迂天長而至
寶應軍以今地推之或由楊家渡或由湯家泮西至楊獸醫壩
而北一清謂路上屍骨如山則秦蘭以南邵伯鎮以西豈尙得
案堵無恐余所居之地舊名倪萬二庄相傳爲宋元舊族余族
自永樂時卜居於此倪萬已不復有人則盡於前此之兵荒可
想而知也嘉靖維揚志舊圖於黃珏橋之東皆標水寨蓋南宋
時地邇淮泗爲兵防戒嚴之地惟黃河北流旣斷全力注淮漕
隄束諸湖之水匯三十六陂而爲一昔時兵火之場悉縕於湖
故月中葉以後士大夫多棲息於此府縣志稱宋元人避地北
湖是未深考耳

黃珏橋北十里有土城口其北有治平寺寺後有南王墩又稱南王墓耕田者嘗於墩上得鐵繩端自土中出按元世祖封脫歡爲鎮南王出鎮揚州世襲其爵自老章及脫不花孛羅不花皆爲之此其墓耶土城蓋亦宋元間堡寨之遺

舊志言九龍山在城西南十五里豐樂鄉下接湖水按九龍山卽九龍岡當云去城北五十里若西南十五里無豐樂鄉亦無湖水也

宋真宗天禧間江淮發運使賈宗言歲漕自真陽入淮汴歷堰者五糧載煩於剝卸議開揚州古河繚城南接運渠毀龍舟新興茱萸三堰鑿近堰漕路以均水勢時王臻爲淮南轉運副使言揚州召伯堰實謝安爲之人思其功以比召伯不可廢也濬

渠亦無所益坐異議降監察御史發運司卒濬渠薛奎傳亦言
奎爲江淮制置發運使疏漕河廢三堰以便餉運按五堰者北
神召伯茱萸新興龍舟也賈宗建議而薛奎行之而所毀者新
興龍舟茱萸三堰召伯北神尙存其後殿直王乙請自召伯埭
東至瓜州浚河百二十里以廢二埭江淮制置發運使以工大
不可就止置牘召伯埭旁人以爲利然則雖置牘而埭在夢溪
筆談言北神召伯諸埭相次廢革至今爲利則乙之後召伯埭
終廢矣今之召伯鎮非古之召伯埭也王乙言召埭東濬河百
二十里至瓜洲則當時埭在運河之西橫隔水中故有剝卸之
煩且今召伯鎮至瓜洲止九十里此云一百二十里則召埭必
非召鎮鎮當新城湖之東而召伯湖在鎮北二十里湖名召伯

必召埭之所在竊疑湯家泮橫亘東西實界南北古之召埭或設於此是則埭在西而河在東與王乙之言合也

太平寰宇記引西征記以吳王釣臺在雷陂按今新城湖楊家渡之南有高阜阜上有松影菴土人呼爲釣魚臺相傳卽吳王釣臺此地去雷塘甚遠西征記作於戴祚其書最古所云雷陂果卽今之雷塘耶廣陵故城在府北十八里今之雷塘在府北十里當漢時且在廣陵城南而廣陵城已近北湖名相襲而方已移故書之所記與故老之所傳兩存焉可也

冢記云齊褚澄有遺書多言修養及醫藥事刻石十八片以爲槨時太清三年題曰有齊褚澄所歸後爲蕭廣所得遺命子淵復爲槨淵用石一片刻敘其上葬於廣陵城北三十五里陳源

橋久之亦被發書傳于世城北三十五里正在北湖陳源橋則不知所在

舊志鳳凰林在城北三十二里招賢鄉宋理宗紹定四年有鳳鳥至故名按今城北無鳳凰林地名惟楊獸醫壩西南有鳳子嶺疑卽此也

黃珏橋南七八里西來菴之南有耿家閘閘南有耿王墳閘北亦有一墳碑上書少司馬大中丞青藜耿公之墓康熙元年立詢之士人言數十年無省墓者郡縣志均無可考記于此以待知者

北湖小志卷六

江都焦循著

家述上

余村舊爲上下兩庄在黃珏橋西南半里許聚族而居屋瓦相接庄後種竹竹外老樹千餘株樹間有樓數里外見之人稱曰焦家樓乾隆間歲苦於水族漸他徙業旣零落丁口亦稀兩庄所存之屋十之二三而已焦氏之先或云自山左來未有徵也伯高祖明遴始創湖上焦氏譜系僅以居揚州北湖者爲斷其他遂莫可考今因之以載於篇

焦氏明初居江都東鄉八港口有祖號望武素敬事真武神最誠夢神促之行曰此地有大厄不可居乃遷於城北澗陳壩之

西未幾靖難兵南渡八港口竟罹於難於是吾族益敬事真武神不祀者非吾族也望武生二子名字不傳分東西分東分生廣始遷下庄廣生有有生鼎鼎生遷遷有厚德舊譜云去世久遠聲名猶載口碑惜乎本末不能備也生四子長府沒於明季金溝河之役次庫幼卒次文科生四子次文舉生七子共十一房爲循高祖輩十一房生四十七房爲循曾祖輩四十七房生九十房爲循祖輩九十房生百二十房爲循父輩文科字仰湖其後爲西分文舉字少湖其後爲東分

西分四房明峻明暘明顯明德明峻生三子必茂必蕙必美必蕙生二子長復榮次亮亮嗣必茂生德潤德潤生彭壽絕明暘字震鳴循高王父也生四子長泰來次必萃次豫來次師來師

來後改名源循曾王父也泰來字廣生縣學生生三子燦焰煥
焰生鶴林嵩林鶴林生增必萃字拔之卒於順治丁亥十月娶
樊孺人年十九姪遺腹孤才兩月孺人忍痛保身明年四月孤
生名鑑孺人撫而教之既成立生子遐齡遐齡年三十而卒妻
劉未三十也苦節終其身劉生三子廕侯爵侯又早卒妻蕭苦
守十八年窮餓而死四世有三節婦惟樊孺人舉於有司樊孺
人處妯娌間和婉藹然時而正色立言則霜氣逼人毛髮莫之
敢近凡守節六十一年邑志云四十四年據舉於有司時也循
曾祖母卞孺人父卞公無子憐女不令習女紅延師教以詩畫
卞孺人遂工詩善畫山水花卉嫁時箱匱皆孺人自繪而題以
詩循幼時尙見匱上詩嫡母謝孺人每抱循手指而誦之述其

爲卞孺人作也族間諸姒娣見奩厚多嫉之又笑其不能鍼也
惟樊孺人相處而善若兄弟時曾祖入學爲學生索逋日迫田
租所入不足給卞孺人乃焚棄筆硯曰此豈婦人事邪盡易簪
珥衣裙以償逋課疆以力田親主爨汲每食粥飯茶蔬器重且
熱孺人一一手掣之布於案然後呼力田者歸食力田者皆喜
穫數倍孺人善治家量入爲出久而漸有贏餘向之嫉且笑者
家日落孺人時以錢穀周卹不念舊憾生二子長炳次鏡鏡字
鑑千循先大父也炳後改名沛然字星若先師事王祖修不能
售於有司復師事郭嗣齡益不售安溪李相國門人胡公督學
江南得伯祖文深奇之取爲郡學生時年已四十目短視廣面
鬚若戟胡公笑曰子之貌何不類儒伯祖厲聲曰孔子貌若俱

儒何貌也聞者肅然甘泉令張公宏運將穿溝引湖繞西山而南達於江不便民里人甚懼值令至湖伯祖往謁力陳不可令恚伯祖隨至縣庭反覆陳其不便狀先是里中奸民嗾令爲此將藉爲利令惑之旣聞伯祖爭當於理自悔悟適大吏亦止之乃止伯祖樸誠不欺見義勇於爲鄉黨憚之有口角詬誶得伯祖一言卽解舉爲約正每朔望集民教之婉曲善導一時訟爲之減宣化使者涂公逢震謂伯祖曰君百里才老於鄉官屈也晚年於宅後起書屋種竹植梧吟誦其中生一子蘭蘭生三子待得徹待無子以增之子廷福爲後豫來字樂生酷好吟日可數十首每遇戚友家几案垣壁題詠殆遍頗以取厭於人已而敗棺廢槨亦書之口吟卽成句其從兄潤畫蘭每竊以詩題其

幅潤以爲汙不能改也明顯生瑞來耀來慶來慶來生鑣鑣生五子鶴永京亶雍永字聲依江都學生善詩古文循曾見族父騶手寫其古文稿及詩今求之不可得又聞有月令注一卷授其門人陳功士今亦不知所在是可惜也明德生必贊

東分七房明達明道明選明遴明遇明通天植明達字雲樓子藻字霞生縣學生尤徵君璋謂其以文行稱生二子錦僕僕字衡若生子璵縣學生霞生弟畹生生二子承露承霖承露字晉筠江都學生明道萬厯乙卯科武舉人舊譜云孝友兼進和藹近人生七子必蘇必蕃必葱必榮必亮淳必亮字雲章與衡若晉筠同以詩名家有別墅與范石湖陳浩海高淡園爲文酒之交今其後人或農或賈先世遺書遂莫可問淳字穆生康熙丁

卯科武亞元時亦知名明選生賡泰賡泰生南俊南傑南吉三世皆讀書爲諸生賡泰字載歌幼聘貢生瞿之秀女未娶而城破瞿居城請於之秀曰予處子恐不及死悔晚矣遂自縊賡泰篤學能文著述甚富有澹園詩統行世南傑生二子繹祖率祖繹祖字維堂工騎射能文章倜儻多才智二十遊京師爲馬公齊所知薦於康親王府中王愛其才甚器使之數十年不得歸雍正初乞歸省墓王使四人隨之訖卽促行明年卒於京師王召率祖往迎喪憫其兄將用其弟率祖臨喪卽位而哭極哀不謁王王使人導之來率祖叩頭謝曰王之恩沒世不敢忘但率祖今日爲兄來見王則不敬兄持兄喪而見王爲不敬王請以異日王聞而歎曰南人善謁秀才乃若是耶益以爲重賜金扇

扇上有王像諭曰有子弟入京持此扇來率祖再拜受卒不見
率祖字履安天性誠篤承祖父之學安道守貧語默動靜未嘗
稍溢規矩其迎兄喪不謁王時人或哂其迂先君子曰此徐孺
子申屠子龍之風也吾族中可爲君子人矣以歲貢生選望江
縣訓導卒於官生一子汝驤字鳳來爲諸生有聲南吉生三子
暉祖紹祖復祖暉祖字益濱江都學生生二子汝翼汝弼明進
縣學生性嗜山水好遠遊著有南遊草湖上焦氏譜生五
來必英必菁必著吉生悅來縣學生生珩珩遊閩中羊城
州府長汀縣小教場久不得歸思念祖墓繪揚州康熙已
至湖尺寸不失懸諸寢室每對之泣下在閩承烈知其
亥赴京師道過揚珩以圖授之令按圖行

言若遊熟徑嗚呼珩之志苦矣然可爲輕去其鄉者戒也吉生
縣學生生需需生步青字雲上善飲酒工文章開門受徒從學
者先後數十人每酣醉文思湧發手指口說名理燦然數十莖
半日而刪訂畢不醉時不能也生一子汝楫縣學生明遇生四
子必芝必齡必莪必達明通縣學生生六子溥演潤潼注淳溥
武學生早卒妻郭氏苦節數十年教子九如讀書爲郡學生生
三子芳芬蒲芳字時若善書法多識里中故事性謹愿無虞詐
先君子重其爲人念其乏設悅來米行令時若當行牙時若以
公平爲糴糶不知輕重出入以巧取利商賈不集又喪子竟老
病以終哀哉演生幅幅生灼甘泉學生潤字德安號仁亭江都
學主爲文氏婿文命時以畫菊之法傳之更工於竹石從黃奇

逸幾不知下筆處性耿介非其人求之千金不許也嘗有詭構其畫者已成矣後知其人大悔於每幅蘭葉上作數驢而不署名字生三子麟士龍士遵祖潼生五子兆熊成五兆彪兆鼇慎兆熊字學時號敬齋雍正丙午科武舉人著敬齋詩一卷生繼武繼轍皆縣學生繼轍字鑒前少貿易折資改而讀書年已二十矣卒爲通人善書法工於詩與詩人張輅交所著有晚翠集蕪城雜詠仿古雜記良友贈言共若干卷生開基福基福基太學生成五字性成太學生生榮武學生善射試泰州時白袍映日放弦貫的學使者以爲異人生夢梅甘泉學生兆彪太學生生繼轅繼彭繼軒繼輻兆鼇字倫士武學生勇力絕倫鄉里畏之生煥字炳文通經學尤深於易補甘泉廩膳生好聚書多異

本皆手校之湖中學者有疑則就而問性溫恭醇遂聞父怒則跪受鄉黨宗族以孝稱年四十一而卒無子倫士公悲憤甚於樓下掘大坎然薪其中盡以所聚書投之燒三日莫敢諫止所著易注亦焚惜哉公面若虎努目而視見者却走而獨愛循每呼至其園亭看花酌酒歡笑累日未覺其可畏也嘗以一硯漬循今藏於篋燠尤深於醫手著一書名醫學指南繼輻故師事煥焚書時匿得之後遷居西山劉家集本此書治人輒效今不知其存矣天植字培之順治辛卯科副榜以文學名生七子濤瀾淇淮瀛浴湧濤字濯月瀾字漢水皆諸生濤生懌愉瀾生愔忱愔生驥忱生軒軒字進辰縣學生洪字衡水太學生未弱冠應鑾使魏公試首拔榜名下注云寸晷立就七藝精純暢達可

卜異日勲名於是文譽噪一時後去而從事貨殖家業日盛篤於倫理合族百餘家貧者養之富者教之推及姻親戚友無不各得其情久而不倦尤慷慨好施急人之難鄉鄰有口角詬誶就而質者輻輳於門骨肉夫婦之間賴公而全者不一其人或田宅貨財以增損爲齟齬公陰解囊以消息之賄累雖千金未嘗有吝色用是黃垺橋鎮四十年無一事質於公廷初有王姓者與里人訟公知之力勸其和旣和王疑公之私於彼也指門而詈公不校亦不辨久之王知公無私且訟不息害將及已於是感公甚後公樹門戟須在王屋中築一楔公戒不可王聞之趨至曰向詈公至今愧悔無以立人世幾成疾果築楔於室庶可釋吾愧而愈吾疾也公嘗獨力修黃垺橋及隄以正月初二

日卒是日湖中人不賀節不知姓名來哭於門者積香楮如邱
烟燄出檐宇幾焚其甕先是有遠方兄弟爭財者過吾里聞公
之風極愧悔歸而復合鄉鄰有鬪者惟恐公聞知村社市集愚
農酣酣怒號毆詈之際主伯不能制其奴隸父兄令不行於子
弟一聞公言闐然散去有含羞背人矢志戒飲者施棺槨掩遺
骼冬散襦袴暑給茶湯頻年水災解倉困以活饑人巡撫穆公
以扁褒其門有老翁鶴髮虬髯策蹇至公門曰吾浙人官於北
方解組者也偶遊淮南耳焦君之化耻當吾世而不識其人特
相訪耳既見公不告姓名而去公之沒也吳寅弔以詩云淒其
念載憶相從歷歷芳規實可宗賤子每蒙青眼顧仙車寧料白
雲封望廬人返思王烈作讚誰能比蔡邕曉向湖天雲黯處春

風吹淚入波溶生四子憬熹惻杰憬字逢庚號醒齋雍正癸卯
科武舉人與徐芑徐棄疾爲詞友著醒齋詩餘一卷居親喪與
兩弟廬於墓三年不宿內不一御酒肉睦嫺任卹排難解紛君
子以爲克承父德也生二子輪軾輪字蒲載軾字應瞻皆縣學
生輪生汝敷太學生以詩名軾一字憑軒又號熊符工詩古文
詞善雅謔書法人歐顏之室壁窠大字揮筆立成縱橫皆如鑄
鐵長於六書一依許氏說文時郡人知說文者尙鮮也循嘗學
詩於公爲公編詩文集爲憑軒遺筆二卷又著梅花詩謎百首
每首隱一物兩面偏肖奇作也生子汝成縣學生熹字效朱號
定齋康熙壬辰科武進士任石匣中營守備陞居庸關都司
誥授明威將軍將軍精槍法勇力敢爲不顧身命賊盜畏之如

虎軍中號曰亂神及其執筆爲小楷細若蠅頭秀韻絕俗時而吟詠則風雅過於文士有所佩刀長尺餘可削鐵陰雨時血光迸出鳴嘯有聲槍首長一尺色黑似鈍以撞物可穿木石初謁李宮保衛於京師召之食謂曰聞君善槍能爲我試乎對曰諾方擎杯置酒席間索槍試試畢復舉杯飲神色不變顧盼自如宮保極愛重之卒於官生二子駒驥駒郡學生生汝斌謹厚長者能詩驥生汝政汝徵惓字外舒太學生爲淮後効以孝弟稱侍嗣母庄居生父母居鎮上每日定省雖風雨不輟仲兄明威將軍之卒于官也往以喪歸溽暑跋涉數千里不以爲勞其好施利物克承先德恒曰吾無他慮惟慮死無以見先人耳生子輯杰太學生生輶輶武學生瀛字右登康熙己丑武進士生

五子愷魚忼忼兆麟愷生轆字麗左縣學生魚字龍門康熙丁酉科武舉人生騮字肩維既入武學學使張公廷璐愛其文令棄武生改試文騮不可曰吾家世武不願文也善詩古文沐浴於左史漢魏中文士莫能及也兆麟武學生生志尹縣學生浴字沂水郡學生生懔字山起縣學生著有中山文稿湧字崑源縣學生

家述下

武進臧庸撰焦氏世德記云焦氏世居江都黃珏橋分縣爲甘泉人自明永樂間聚處湖濱上下庄有舊樓爲嘉靖年所構蓋以忠厚世其家已三百餘年矣有文科者掌江都刑掾未嘗妄受人一錢往往脫人於死其後積昌長房充是掾者有違先訓

子孫遂絕文科子明暘與諸弟已析產旣而諸弟疑明暘之產獨厚索分之明暘曰此本先人之產也卽如所欲子之明暘子源娶於卞卞家故饒且能詩工書畫時源與諸兄同居諸婦嫉卞之奩厚迫源析產而遣以先債源與卞躬耕自給卞并鬻其釵珥以償逋久之業復舊恤其兄之子不遺力源子鏡元旦遇無賴子於塗辱之毀其冠鏡退易冠而出逾日無賴子自愧造門謝鏡念其貧厚給之娶於王明吏部納諫之元孫女生子蕊王氏世以易名家吏部之曾孫明經祖修以易教授葱爲明經外孫得聞王氏易說並熟焦氏易林郭璞葬法嘗一應童子試以咯血廢業補國子監生性好施與遺田八九百畝以是中落於孤子孀婦周之尤至有謝姓者昏夜叩門曰吾逋多將售所

居以償之他人皆利子錢子獨否是以竊告幸偕往取償遲則爲他人得矣則艱然曰子奈何輕棄祖宅我豈迫人賣屋錢耶卒勿取歲歉棄產以償貨適戚有喪卽分助之曰吾尚有產可棄不可俾吾親戚無所殯有爲人行其詐者人不忍欺舉以告則權辭以答之而不明其詐並慮詐者之自愧也戒家人勿使知性和易無疾言遽色橫逆來受而不報客至雖卑幼必加禮語不及義則正色謝之相者謂兩目如蠶眠法無子久之復遇相者曰蠶化爲紅色此陰德之徵當得子已而果然自筮將終取貧者之券焚之負人者盡償之曰不可俾吾子孫失忠厚意也嘗謂曾子述顏子之行曰有若無實若虛以能問於不能以多問於寡孟子述顏子之言曰舜何人也予何人也有爲者亦

若是而孔子言慮以下人當仁不讓於師顏子語本此學顏子者貴學其虛心又貴學其立志三年之喪禮經所載儀節極詳而委曲繁重律之今人蓋未能一時行之也古人處已接物務正大光明耳語爲人鄙目語爲人疑不足立名亦不足保身矣魏胡質辭交於張遼曰古人取多知其不貪奔北知其不怯聞流言而不信故交可久武伯南身爲雅士將軍稱之不容於口今以睚眦乃爲嫌隙况質才薄豈能終好遼感其言與伯南如初交友者宜三復之張公藝九世同居力持忍字余謂骨肉當通以至誠疑則釋之俾可共見若久蓄而不化一旦發之必潰矣又曰爲善而使人不可受則厚反爲薄誠於善者必能曲達使施之無迹受之無愧陽善陽報之陰善陰報之好名名報之

世之稱君子者後或不昌稱小人者後或繇盛此其際微矣人
與我爭名則自化其矜人與我爭利則自戒其貪不矜不貪將
何所爭其事在能分謗已不受過而諉諸人人何以堪旣不能
全已之交又不能全人之交則市道也娶於謝年三十四無子
謝請曰翁之喪無孫成服吾之咎也又曰姑年六十忍令不抱
孫乎亟求宜子者因納殷並納陳殷生子三人長循嘉慶辛酉
舉人次律國子監生次徵揚州府學生謝教子口授毛詩及古
孝弟忠信事多置紙筆令學書又則召殷共績麻枲或造鬼鏹
而不作詩曰詩非婦人事也先祖姑卞孺人深於詩晚年以爲
戒陳性慙且多詐嫉殷搆釁或諷殷以去殷曰婦人從一而終
去將安之或勸謝逐陳殷又不可曰去人留已人謂我何乃避

之宅西屏華飾習農事諳其利病而能其勞苦謝以爲賢亟迎之歸謝病殷事之惟謹謝命婢啟笥出釵服曰此先翁姑所賜命吾爲婦者今授汝殷涕泣受之越二年謝卒殷笥以向所受者爲歛曰昔者不辭重違孺人意耳今仍歸諸孺人踊哭髭麻之節不異子婦之事舅姑也循之子廷琥江都縣學生績學能紹其祖父業臧庸曰余讀里堂孝廉所撰佩士先生並謝殷兩孺人事略未嘗不肅然起敬歎令德之日昌不德之日促也上自高曾上逮孫子蓋七世三百年莫不以忠厚文學世其家而又代有賢母以爲內助知其祖宗以來詒謀深而積德遠矣佩士先生家訓尤深遠明確得古聖賢精意蓋粹然有道之儒也孝廉樸學治經生家言精天文算術著羣經宮室圖考里堂

學算記凡若干卷醴泉有源靈芝有根信矣孝廉不以庸爲不
文手持是冊乞言者再庸深愧淺薄不足以發明其旨而竊喜
焦氏之世以厚德相嬗也因刻其言行之大者爲世德記並以
自警其生卒年月子孫字號已詳墓表誌銘者不復贅云嘉慶
十二年歲次丁卯午白武進臧庸記於廣陵城南之淮海樓



